

## ■ TRIBUNA POLITICA

# Partir cun speranza

DA SILVA SEMADENI,  
CUSSEGLIERA NAZIUNALA

Las elecziuns dals 20 d'october han procurà en mes eglis per in resultat grischun fantastic. L'onda verda e la forza da las dunnas han purtà dus mandats a la ps, duas novas cusseglieras naziunalas e tranter quellas schizunt ina dunna dal Grischun talian. Per mai è quai en tuts regards ina gronda satisfacziun. Il stgaurament dal clima e dumondas da l'ambient, egualitad dals dretgs e giustia sociala gudognan d'importanza. E finalmain èn represchentadas era las dunnas grischunas commensuradamain a Berna.

In zic cumpassiun sent jau schon era per ils umens grischuns e per quels da la ps svizra che n'èn betg pli vegnids reelegids. Jau sai ord atgna experientscha tge che quai signifitga. Tuttina ma legrel jau da las bleras novas parlamentarias. En il cussegl naziunal surpasa la quota da dunnas per l'emprima giada il 40%. E las finamiras ecologicas vegnan promovidas da bleras forzas novas verdas. La giuventetgna dal clima e la chautma da dunnas dals 14 da zercladur han contribuì essenzialmain a quest resultat. Quai mussa: I basegna dapli squitsch da la populaziun per muventar in parla-



ment per ils interess da la communitad, per la gronda sfida climatica. Pervi dal stgaurament dal clima cuntinuant succeda quai prest sin l'entir mund. E mintga pajais sto contribuir sia cumpart per la protecziun dal clima, ils pli povers cun il sustegn dals pajais ritgs. Er il nov parlament a Berna sto prender decisiuns pli consequentas.

Sco muntagnarda ed ecologista m'engasch jau dapi onns, schizunt dapi decennis per la protecziun dal clima – ed er en il futur fatsch jau quai sco commembra en il comité da l'iniziativa per ils glatschers. Jau na chapesch betg ch'ils represchentants burgais da las regiuns alpinas mettan questa finamira anc adina davos ils interess economics. Gist las regiuns da muntogna èn pertutgadas il pli ferm da las temperaturas pli autas e da las midadas tar las precipitaziuns.

Ils resultats da las pli novas retschertgas mussan tenor Meteoschweiz che las temperaturas medias en las Alps vegnan a s'augmentar enfin il 2060 per 3,8° Celsius. Las consequenzas avain nus gia davant eglis. La nova cussegliera naziunala *Anna Giacometti* las ha vividas a moda directa e drammatica a Bondo. Il stgaurament da la terra n'è deplorablmain betg pli dad evitar, dentant savain e stuain nus limitar el. Cun la strategia d'energia 2050 e la revisiun actuala da la lescha dal CO<sub>2</sub> faschain nus pass impurtants e socialmain cumpatibels – ulteriurs ston dentant anc suandar. L'iniziativa per ils glatschers che vegn inoltrada proximamain gida latiers. Enfin il 2050 duai la Svizra vegnir neutrala al clima, ina finamira zunt exigenta per tuts. Dapi dacurt prenda – grazia a *Simonetta Sommaruga* – er il cussegl federal en mira quest intent. I fa da basegn però era d'ina strategia d'adattaziun a la midada dal clima sco ch'il cussegl federal ha sviluppà quai gia en il 2012 e ch'el actualisescha uss. Protecziun dal clima ed adattaziuns a las consequenzas da la midada dal clima vegnan adina pli impurtantas – e n'èn betg gratuitas. Dentant: Far nagut fiss pli char – e quai vegniss a custar a nus l'avegnir.